


萬首唐人絕句

五言

十四卷



萬首唐人絕句卷第十四

五言一百首

寒食下第

武元衡 五首

柳挂九衢絲花飄萬家雪如何憔悴人對此芳菲節

途中即事

南征復北還擾擾百年間自笑春塵裏生涯不暫閑

春日偶作

縱橫桃李枝澹蕩春風吹美人歌白紵萬恨在蛾眉

夏夜作

夜久喧暫息池臺惟月明無因駐清景日出事還生

寒食日同陳六游山院

年少輕行樂東城南陌頭與君寂寞意共作草堂游

喜遇劉二十八

裴度 三首

病來佳興少老去舊游希笑語縱橫作盃觴絡繹飛

送劉

不歸丹掖去銅竹漫云云唯喜因過我須知未賀君

再送

頃來多謔浪此夕任喧紛故態猶應在行期未要聞

房公舊竹亭聞琴

李德裕 七首

流水音長在青霞意不傳獨悲形解後誰聽廣陵絃

題羅浮石

清景持芳菊涼天倚茂松名山何必去此地有羣峯

無題

松倚蒼崖老蘭臨碧澗衰不勞鄰舍笛吹起舊時悲

題冠蓋里

偶來冠蓋里媿是舊三公自喜無兵術輕裘上闕宮

雪霽晨起

雪覆寒谿竹風卷野田蓬四望無行跡誰憐孤老翁

題竒石

蘊玉抱清暉閑庭日蕭洒塊然天地間自是孤生者

上張相公寫舊唱和詩

賦感鄰人笛詩留夫子墻延年如有作應不用山王

和晉公三首

李紳五首

鳳儀常欲附蚊力自知微願假罇壘末膺門自此依
貂蟬公獨步鴛鷺我同羣插羽先飛酒交鋒便著文
窮陰初莽蒼離思漸氛氳殘雪午橋岸斜陽伊水濱

古風二首

春種一粒粟秋成萬顆子四海無閑田農夫猶餓死
鋤禾日當午汗滴禾下土誰知盤中食粒粒皆辛苦

題玉潭

獨孤及一首

碧玉徒強名冰壺難比德唯當寂照心可並齋淪色

春日歸家

李嘉祐三首

自覺勞鄉夢無人見客心空餘庭草色日日伴愁襟

遠寺鍾

踈鍾何處來度竹兼拂水漸逐微風歛依依猶在耳

白鷺

江南淶水多顧影逗輕波終日秦雲裏山高柰若何

樂府

陸長源一首

芙蓉初出水菡萏露中花風吹著枯木無柰值空槎

白銅鞮

徐凝十四首

騷裏錦障泥樓頭日又西留歡住不住素齒白銅鞮

陽叛兒

哀怨陽叛兒駘蕩郎知否香死博山爐煙生白門柳

春寒

亂雪從教舞回風任聽吹春寒能作底已被柳條欺

廬山獨夜

寒空五老雪斜月九江雲鍾聲知何處蒼蒼樹裏聞

天台獨夜

銀地秋月色石梁夜溪聲誰知屐齒盡為破烟苔行

送寒巖歸士

不挂絲纈衣歸向寒巖棲寒巖風雪夜又過巖前溪

送陳司馬

家寄茅洞中身遊越城下寧知謫長史不憶陳司馬

武夷山仙城

武夷無上路毛徑不通風欲共麻姑住仙城半在空

避暑二首

一株金染密數畝碧鮮疎避暑臨溪坐何妨直釣魚
斑多筒簟冷髮少角冠清避暑長林下寒蟬又有聲

浙西李尚書奏廢淫昏廟

傳聞廢淫祀萬里靜山波欲慰靈均恨先燒斬尚祠

酬相公再遊雲門寺

遠羨五雲路透迤千騎回遺簪唯一去貴賞不重來

杭州祝濤頭二首

不道沙堤盡猶欺石棧頑寄言飛白雪休去打青山
倒打錢塘郭長驅白浪花吞吳休得也輸却五千家

晚春別

韓琮一首

晚日低霞綺晴山遠畫眉青青河昨草不是望鄉時

銜魚翠鳥

楊巨源三首

有意蓮葉間瞥然下高樹壁破得全魚一點翠光去

和鄭相公尋宣上人

人不遇

方尋蓮境去又值竹房空幾韻飄寒玉餘清不在風

題范陽金臺驛

六國唯求客千金遂築臺若令逢聖代憔悴郭生回

耗磨日飲

趙冬曦一首

春來半月度俗忌一朝閑不酌他鄉酒無堪對楚山

長安秋望

杜牧二十七首

樓倚霜樹外鏡天無一毫南山與秋色氣勢兩相高

獨酌

牕外正風雪擁爐開酒缸何如釣船雨篷底睡秋江

醉眠

秋醪雨中熟寒齋落葉中幽人本多睡更酌一尊空
不飲贈酒

細算人生事彭殤共一籌與愁爭底事要爾作戈矛
過田家宅

安邑南門外誰家板築高奉誠園裏地墻缺見蓬蒿
獨柳

含煙一株柳拂地搖風久佳人不忍折悵望回纖手
將赴湖州題亭菊

陶菊手自種楚蘭心有期遙知漉江日正是擷芳時
折菊

籬東菊徑深折得自孤吟雨中衣半濕擁鼻自知心
吳李給事中敏

陽陵郭門外坡陀丈五墳九泉如結友茲地好埋君
黃州竹筵

竹岡蟠小逕屈折鬪虵來二年得歸去知遶幾千回
題寺樓

暮景千山雪春寒百尺樓獨登還獨下誰會我悠悠
八松院小石

雨滴珠璣碎苔生紫翠重故關何日到且看小二峯
送人游湖南

賈傅松醪酒秋來美更香
憐君片雲思一棹去瀟湘
籌筆驛

郵亭寄人世人世寄郵亭
何如自籌度鴻路有冥冥
寄遠

隻影隨鷺鴈單栖鎖畫籠
向春羅袖薄誰念舞臺風
送盧秀才

春瀨與煙遠送君孤棹開
濕浚如不改愁更釣魚來
醉題

金鑷洗霜鬢銀觥敵露桃
醉頭扶不起三丈日還高
山莊

好鳥疑敲磬風蟬認軋箏
篁與嘉樹偏倚半巖生
盆池

鑿破蒼苔地偷他一片天
白雲生鏡裏明月落階前
有寄

雲闊煙深樹江澄水浴秋
美人何處在明月萬山頭
寄遠人

終日求人卜回回道好音
那時離別後入夢到如今
別沈處士

舊事參差夢新程迤邐秋
故人如見憶時到寺東樓
歸家

稚子牽衣問歸來何太遲共誰爭歲月贏得鬢邊絲
遣懷

道泰身還泰時來命不來何當離城市高臥博山隈
江樓

獨酌芳春酒登樓已半醺誰驚一行鴈衝斷過江雲
驪驪坂二首

瑤池罷游宴良樂委塵沙遭遇不遭遇鹽車與鼓車
荊州一萬里不如崩易度仰首望飛鳴伊人何異趣

憶鄱陽舊遊
顧況二十三首
悠悠南國思夜向江南泊楚客腸斷時月明楓子落

蕘後吟

醉中還有蕘身外已無心明鏡唯知老青山何處深

題靈山寺

覺地本隨身靈山重結因如何戰鳥佛不化捕魚人

題元陽觀舊讀書房贈李範

此觀千年游此房千里宿還來舊窓下更取君書讀

永嘉

東甌傳舊俗風日江邊好何處樂神聲夷歌出烟島

青弋江

淒清回泊夜淪波激石響村邊草市橋月下罟師網

聽山鷓鴣

誰家無春酒 何處無春鳥 夜宿桃花村 踏歌換天曉
臨平塢雜題十三首

山逕柳

宛轉若游絲 淺深栽綠掩 年年立春後 即被啼鶯占
石上藤

空山無鳥跡 何物如人意 委曲結繩文 離披草書字

薜荔菴

薜荔作禪庵 重疊庵邊樹 空山徑欲絕 也有人知處

芙蓉榭

風擺蓮衣乾 月背鳥巢寒 文魚翻亂葉 翠羽上危欄

歛松漪

湛湛碧漣漪 老松歛側臥 悠揚綠蘿影 下拂波紋破

焙茶塢

新茶已上焙 舊架憂生醜 旋旋續新烟 呼兒劈寒木

彈琴谷

谷中誰彈琴 琴響谷冥寂 因君扣商調 蟲驚暗壁

白鷺汀

霍靡汀草碧 淋森鷺毛白 夜起沙月中 思量捕魚策

千松嶺

終日吟天風 有時天籟止 問渠何旨意 恐落凡人耳
黃菊灣

時菊凝曉露 露華滴秋灣 仙人釀酒熟 醉裏飛空山
臨平湖

采藕平湖上 藕泥封藕節 船影入荷香 莫衝蓮柄折
山香洞

引燭踏仙泥 時時亂乳燕 不知何道士 手把靈書卷
石竇泉

吹沙復噴石 曲折仍圓旋 野客漱流時 杯粘落花片
古仙壇

遠山誰放燒 疑是壇邊醮 仙人錯下山 拍手壇邊笑
題鄱陽蕭寺

不知何世界 有處似南朝 石路無人掃 松門被火燒
題山頂寺

遙聞林下語 知是經行所 日暮香風時 諸天散花雨
天寶題壁

五十餘年別 伶俜道不行 却來書處在 惆悵似前生
哭李別駕

故人行跡滅 秋草向南悲 不欲頻回步 孀妻正哭時
春雨不聞百舌

百舌春來啞愁人共待晴不關秋水事飲恨亦無聲

驚雪

陸暢 三首

怪得北風急前庭如月輝天人寧許巧剪水作花飛

聞早蟬

落日早蟬急客心聞更愁一聲來枕上夢裏故園秋

別劉端公

連騎出都門秋蟬噪高柳落日辭故人自醉不關酒

貞女墓

邵謁 三首

生持節操心死作堅貞鬼至今墳上春草木無花卉

送友人江行

送君若浪水疊疊愁思起夢覺若月明相送秋江裏

瞽者歎

我心豈不平我目自不明徒云備雙足天下何由行

萬首唐人絕句卷第十四

萬首唐人絕句卷第十五

五言一百首

散關遇雪

李商隱 三十七首

劍外從軍遠無家與寄衣散關三尺雪回夢夢鴛機

樂遊

向晚意不適驅車登古原夕陽無限好只是近黃昏

巴江柳

巴江可惜柳柳色綠侵江好向金鑾殿移陰入綺窻

聽鼓

城頭疊鼓聲城下暮江清欲問魚陽糝時無禰正平

憶梅

定定住天涯依依向物華
寒梅最堪恨長作去年花
漫成二首

沈約憐何遜延年毀謝莊
清新俱有得名譽底相傷
霧夕詠芙蓉何郎得意初
此時誰最賞沈范兩尚書
柳下暗記

無柰巴南柳千條傍吹臺
更將黃映白擬作杏花媒
妓席

樂府聞桃葉人前道得無
勸君書小字切莫喚官奴
風

撩釵盤孔雀惱帶拂鴛鴦
羅薦誰教近齋時鎖洞房
代應

昨夜雙鉤敗今朝百草輸
關西狂小吏唯喝遶床盧
張惡子廟

下馬捧椒漿迎神白玉堂
如何鐵如意獨目與姚萇
百果嘲櫻桃

珠寶雖先熟瓊苳縱早開
流鸞猶故向爭得諱含來
荅

衆果莫相誚天生名品高
何因古樂府唯有鄭櫻桃
襪

嘗聞宓妃渡水欲生塵好借常娥着清秋踏月輪
追代盧家人嘲堂內

道却橫波字人前莫漫羞只應同楚水長短入淮流
天涯

春日在天涯天涯日又斜鸞啼如有淚為濕最高花
早起

風露澹清晨簾間獨起人鸞花啼又笑畢竟是誰春
細雨

帷飄白玉堂簾卷碧牙床楚女當時意蕭蕭髮彩涼
歌舞

遏雲歌響清回雪舞腰輕只要君流盼君傾國自傾
房君珊瑚散

不見姮娥影清秋守月輪月中閑杵臼桂子搗成塵
嘲櫻桃

朱實烏含盡青樓人未歸南園無限樹獨自葉如幃
自況

陶令棄官後仰眠書屋中誰將五斗米擬換北窓風
蝶

孤蝶小徘徊翩翾粉翅開併雁傷皎潔頻近雪中來
夜意

簾垂幕半卷枕冷被仍香如何爲相憶
鬼夢過瀟湘
李夫人二首

一帶不結心兩股方安髻慙慙百
茅人月沒教星替
剩結茱萸枝多擘秋蓮的獨自有
波光綵囊盛不得

滯雨

滯雨長安夜殘燈獨客愁故鄉雲
水地歸夢不宜秋

微雨

初隨林靄動稍共夜涼分窻逼侵
燈冷庭虛近水聞
高花

花將人共笑籬外露繁枝宋玉臨
江宅墻低不擬窺

嘲桃

無賴妖桃面平明露井東春風爲
開了却擬笑春風
錢席重送從叔之梓州

柳枝五首

花房與蜜脾蜂雄蛺蝶雌同時不
同類那復更相思
木是丁香樹春條結始生玉作彈
碁局中心亦不平
嘉瓜引蔓長碧玉冰寒漿東陵雖
五色不忍值牙香
柳枝井上蟠蓮葉浦中乾錦鱗與
繡羽水陸有傷殘
畫屏繡步障物物自成雙如何湖
上望只是見鴛鴦

戲贈張郎

盧象一首

少婦石榴裙新粧白玉面能迷張公子不許時相見

送別

王之渙二首

楊柳東門樹青青夾御河近來攀折苦應為別離多

登鶴雀樓

白日依山盡黃河徹海流欲窮千里日更上一層樓

長相思

張繼二首

遼陽望河縣白首無由見海上珊瑚枝年年寄春燕

感懷

調與時人背心將靜者論終年帝城裏不識五侯門

挽歌

于鵠一首

陰風吹黃蒿挽歌渡秋水車馬却歸城孤墳月明裏

青樓曲

于濇一首

青樓臨大道一上一回老所思終不來極目傷春草

古歌二首

薛維翰

美人怨何深含情倚金閣不嚙復不語紅淚雙雙落

美人閉紅燭獨坐裁新錦頻放翦刀聲夜寒知未寢

送從弟赴上都

劉商十首

車騎秦城遠囊裝楚客貧月明思遠道詩罷訴何人

登相國寺閣

晴日登臨好春風各望家垂楊夾城路客思逐楊花
酬濟上人采藥見寄

王英期共采雲嶺獨先過應得靈芝也詩情一倍多
曲水寺枳實

枳實透僧房攀枝置藥囊洞庭山上橘霜落也應黃
酬問師

虛空無處所髮髻似琉璃詩境何人到禪心又過詩
設秀才求詩

傾蓋見芳姿暗天瓊樹枝連城猶隱石唯有卞和知
行營即事

萬姓厭干戈三邊尚未和將軍誇寶劍功在殺人多

綠珠怨

從來上臺榭不敢倚闌干零落知成血高樓直下看

山口意

達曉寢衣冷開帷霜露凝風吹昨夜淚一片枕前冰

口大蕭掄

何處哭故人青門水如箭當時水頭別從此不相見

水亭

裴夷直 十二首

歲律行將盡愛君恩竟未回門前即潮水朝去暮常來

坦切州寄諸子

千里隔煙波孤舟宿何處遙思耿不眠淮南夜風雨
酬盧郎中游寺見招不遇

偶出送山空不知游梵宮秋光古松下誰伴一仙翁

宮中言

秋樹却逢暖未凋能幾時何須尚松桂搖動暫青枝
唁人喪侍兒

夜情河耿耿春恨草綿綿唯有常娥月從今照墓田

席上夜別張主簿

紅燭前還明綠尊添又滿不愁前路長只畏今宵短

方丈泉

循涯不知淺見底似非深永日無波浪澄澄照我心

晚望

日下夕陰長前山凝積翠白鳥一行飛聯聯粉書字

前山

只謂一蒼翠不知猶數重晚來雲映處更見兩三峯

發交州日留題解鍊師房

又喜房廊接今成道路賒明朝回首處此地是天涯

令和州買松

好覓凌霜質仍須帶雨栽須知剖竹日便是看松來

題斷金集後

一覽斷金集再悲埋玉人牙絃千古絕珠淚萬行新

長安道

鞠信陵一首

朱門映綠楊雙闕抵通莊玉珮登逾遠紅塵猶自香

春懷舊游

雍陶八首

吟想舊經過花時奈遠何別來長似見春夢入關多

離京城宿商山作

山月吟聲苦春風引思長無由及塵土猶帶杏花香

秋館雨夜

夜雨空館靜幽人起徘徊長安醉眠客豈知新鴈來

聞子規

百鳥有啼時子規聲不歇春寒四鄰靜獨叫三更月

懷無可上人

山寺秋時後僧家夏滿時清涼多古跡幾處有新詩

長安客感

客淚如危葉長懸零落心況是悲愁日臨風制不禁

送客遙望

別遠心更苦遙將目送君光華不可見孤鶴沒秋雲

傷靡草

靡草似客心年年亦先死無由伴花落暫得因風起

木槿

劉庭琦一首

物情良可見人事不勝悲莫待朝榮好君看暮落時

別輞川

王縉一首

山月曉仍在林風涼不絕殷勤如有情惆悵令人別

嶺外守歲

李福業一首

冬去更籌盡春隨斗柄回寒暄一夜隔客鬢兩年催

碧玉歌

李暇四首

碧玉上官妓出入千花林珠被玳瑁床感郎情意深

怨詩三首

羅敷初搵髻蕙芳正嬌小月落始歸船春眠怕著曉
何處期郎近小苑花臺閒相憶不可見且復乘月還

別前花照路別後露垂葉歌舞須及時如何坐悲妾

訪法通師不遇

姚合十二首

訪師師不遇禮佛佛無言依舊將煩惱黃昏入宅門

石碑

荒田一片石文字滿青苔不是逢閑客何人肯讀來

老馬

卧多扶不起唯向主人嘶惆悵東郊道秋來雨不泥

鶴雛

白毛生未足嶮峭醜於雞每夜穿籠出搗衣砧上栖

新菊

黃金色未足摘取且新嘗若待重陽日何時異衆香
春日游慈恩寺

年長歸何處青山未有家賞春無酒飲多看寺中花

白皁驕

為底胡姬酒長來白皁驕摘蓮拋水上郎意在浮花
送薛郎中往婺州

我住浙江西君去浙江東日日心來往不畏浙江風

和李舍人冬至日

獻壽人皆慶南山復北堂從今千萬日此日又初長
酬張郎中

白髮年來盡滄江歸去遲何當得携手松下靜吟詩

別杭州

醉與江濤別江濤惜我游他年昏嫁了終路此江頭

秋中夜坐

踈散永無事不眠常夜分月中松露滴風引鶴同聞

長干曲四首

崔顥

君家何處住妾住在橫塘停船暫借問或恐是同鄉
家臨九江水來去九江側同是長干人生小不相識
下渚多風浪蓮舟漸覺稀那能不相待獨自逆潮歸
三江潮水急五湖風浪涌由來花性輕莫畏蓮舟重

萬首唐人絕句卷第十五

萬首唐人絕句卷第十六

五言一百首

游昌化精舍

柳明獻一首

寶臺侵漢遠金地接霞高何必遊天外忻此契盧敖

宮詞二首

張祜二十六首

故國三千里深宮二十年一聲河滿子雙淚落君前
自倚能歌日先皇掌上憐新聲何處唱腸斷李延年

昭君怨二首

萬里邊城遠千山行路難舉頭唯見日何處是長安
漢庭無大議戎虜幾先和莫羨傾城色昭君恨最多

夕次竟陵

南風吹五兩日暮竟陵城腸斷巴江月夜蟬何處聲

信州水亭

南簷架短廊沙路白茫茫盡日不歸處一庭梔子香

蘇小歌三首

車輪不可遮馬足不可練長怨十字街使郎心四散
新人千里去故人千里來剪刀橫眼底方覺淚難裁
登山不愁峻涉海不愁深中擘庭前棗教郎見赤心

樹中草

青青樹中草託根非不危草生樹却死榮枯君可知

七里瀨漁家

七里垂鉤叟還傍釣臺居莫恨無名姓嚴陵不賣魚

讀曲歌五首

窓中獨自起簾外獨自行愁見蜘蛛織尋思直到明
碓上米不舂窓中絲罷絡看渠駕去車定是無四角
不見心相許徒云脚漫勤摘荷空摘葉是底採蓮人
窓外山魈立知渠脚不多三更機底下摸着是誰梭
郎去摘黃瓜郎來收赤棗郎耕種麻地今作西舍道

玉樹後庭花

輕車何草草獨唱後庭花玉座誰為主徒悲張麗華

莫愁樂

儂居石城下，即到石城遊。自郎石城出，長在石城頭。
襄陽樂

大堤花月夜，長江春水流。東風正上信，春夜特來遊。
自君之出矣

自君之出矣，萬物看成古。千尋葶藶枝，爭奈長長苦。
夢江南

行吟洞庭句，不見洞庭人。盡日碧江夢，江南紅樹春。
將離岳州留獻徐員外

高齋長對酒，下客亦霑魚。不為江南去，還來郡北居。
題彭澤盧明府新樓

碧落新樓迥，清池古樹閑。先賢盡玄宰，空看縣南山。
贈禪師

坐見三生事，宗傳一衲來。已知無法說，心向定中灰。
江南逢故人

河洛多塵事，江山半舊游。春風故人夜，又醉白蘋洲。
松江懷古

碧樹吳洲遠，青山震澤深。無人蹤范蠡，蠶煙水暮沉沉。
登鶴雀樓

暢當 一首
迥臨飛鳥上，高出世人閒。天勢圍平野，河流入斷山。

雜怨

聶夷中 五首

良人昨日去，明月又不圓。別時各有淚，零落青樓前。

烏夜啼

衆鳥各歸枝，烏烏爾不棲。還應知妾恨，故向綠窓啼。

起夜來

念遠心如燒，不覺中夜起。桃花帶露泛，立在月明裏。

古別離

欲別牽郎衣，問郎遊何處。不恨歸日遲，莫向臨邛去。

長安道

此地無駐馬，夜中猶走輪。所以路傍草，少於衣上塵。

銅雀妓

朱放 一首

恨唱歌聲咽，愁翻舞袖遲。西陵日欲暮，是妾斷腸時。

自君之出矣

辛洪智 一首

自君之出矣，絃吹絕無聲。思君如百草，撩亂逐春生。

中書寓直

楊師道 一首

雲暗蒼龍闕，沈沈殊未開。窻臨鳳皇沼，颯颯雨聲來。

送僧南遊

鮑溶 十首

且攀隋宮柳，莫惜江南春。師有懷鄉志，未爲無事人。

玉清壇

上陽宮裏女，玉色楚人多。西信無因得，東遊柰樂何。

酬江公見寄

曾答鴈門偈為憐同社人多
慙惠休日偕得比陽春
酬范侍御六首

雲髻鳳文鈿對君歌少年萬金酬一醉莫惜十千錢
玉管傾杯樂春園鬪草情野花無限意處處逐行人
聞道山中酒一杯千日醒黃鶯似傳語勸酒太丁寧
紅袂歌聲起因君始得聞黃昏小垂手與我駐浮雲
相勸醉年華莫醒春日斜春風宛陵道萬里晉陽花
歲日勸屠蘇楚聲山鷓鴣春風入君意千日不須臾

山居

窈窕垂澗蘿蒙茸采葛花
鴛鴦憐碧水照影舞金沙

送靈一上人

陳羽一首

十年勞遠別一笑喜相逢
又上青山去青山千萬重

樂府

崔國輔十六首

朝日照紅粧擬上銅雀臺
畫眉猶未了魏帝使人催
採蓮曲

玉淑花紅發金塘水碧流
相逢畏相失並著采蓮舟

王孫遊

自與王孫別頻看黃鳥飛
應由春草誤著處不成歸
妾薄命

雖入秦帝宮不上秦帝床夜夜玉窓裏與他卷羅裳

王昭君

漢使南還盡胡中妾獨存紫臺懸望絕秋草不堪論

子夜冬歌

寂寥抱寒心裁羅衣絮絮夜久頻挑燈霜寒剪刀冷

襄陽曲二首

蕙草嬌紅萼時光舞碧鷄城中美年少相見白銅鞮
少年襄陽地來往襄陽城城中輕薄子知妾解秦箏

麗人曲

紅顏稱絕代欲並真無侶獨有鏡中人由來自相許

今別離

送別未能旋相望連水口船行欲映舟幾度急揺手

小長干曲

月暗送潮風栢尋路不通菱歌唱不輟知在此塘中

怨詞二首

樓前桃李踈池上芙蓉落織錦猶未成蟲聲入羅幕
妾有羅衣裳秦王在時作爲舞春風多秋來不堪著

少年行

遺却珊瑚鞭白馬嬌不行草臺折楊柳春日路傍情

中流曲

歸時日尚早更欲向芳洲渡口水流急回船不自由
送韓十四被魯王推遷往濟南

西候情何極南冠怨有餘梁王雖好事不察獄中書

渭水西別李崧

隴外長亭堠山深古塞秋不知嗚咽水何事向西流

偶題

堯藩一首

越女收龍眼蠻兒拾象牙長安千萬里走馬送家家

貧女

張碧二首

豈是昧容華豈不知機織自是生寒門良媒不相識

幽思

金爐煙靄微銀缸殘影滅出戶獨徘徊落花滿明月

題西施浣紗石

胡幽正二首

一朝入紫宮萬古遺芳塵至今溪邊花不敢嬌青春

歸四明

海色連四明仙舟去容易天籍豈輒問不是卑朝士

李舍人惠家醞

寧羣一首

禁鎖天漿嫩虞行夜日寒一瓢那可醉應遣試嘗看

草堂夜坐

寧羣二首

匣中三尺劍天上少微星勿謂相去遠壯心曾不停

觀畫鶴

華亭不相識衛國復誰知
悵望中天羽甘心任畫師
遊仙詞
寧羣一首

海上神山綠溪邊
杏樹紅不知何處去
月照玉樓空
過二妃廟
崔塗三首

殘陽楚水畔
獨吊舜時人
不及廟前草
至今江上春
送友人

登高迎送遠
春恨併依依
不得洽洲信
空看白鶴歸
擄聲

煙外撓聲遠
天涯客夢回
爭知江上客
不是故鄉來
新成小亭月夜
能孺登一首

已被月知處
斬新風到來
無人伴幽境
多取木蘭栽
贈空禪師
喻鳧六首

虎見修行久
松知夏臘高
寒堂坐風雨
瞑目尚波濤
西山寒日逢韋侍御

獬廌霜中見
龍鍾病後顏
淒傷此身事
風雪動江山
題禪院

無花地亦香
有鶴松多直
向北奚必孤
山僧盡相識
感寓

江鄉十年別
京國累日同
在客幾多事
俱付酒杯中
晚思

鶴下紫閣雲沉沉翠微雨獨坐正無言孤莊數聲杵
驚秋

鶯囀才聞關蟬鳴旋蕭屑如何兩鬢毛不作千枝雪

贈桂林友人

李頻九首

君家桂林下日伐桂林炊何事東堂桂年年待一枝

題長孫桐樹

一去龍門側千年鳳影移空餘剪圭處無復在孫枝

渡漢江

嶺外音書絕經年復歷春近鄉情更怯不敢問來人

嵩山夜還

家住東臯下好采舊山薇自省遊泉石何曾不夜歸

長安感懷

一第知何日全家待此身空將灞陵酒酌送向東人

和友人落第將歸感懷

帝里無春意歸山對物華即應來到日九陌踏槐花

遊蜀日憶友人

別來十二月去到漏天邊不是因逢閨須知已隔年

聞北虜入靈州二首

河冰一夜合虜騎滿靈州歲歲徵兵去徒防塞草秋
見說靈州戰沙中血不乾將身歸告急走馬向長安

終南山望餘雪

祖詠 一首

終南陰嶺秀積雪浮雲端林表明霽色城中增暮寒

留別王維

崔興宗 一首

駐馬欲分襟清寒御溝上前山景氣佳獨往還惆悵

地肺山春日

溫庭筠 三首

萼萼花明岸涓涓水遶山幾時拋俗事來共白雲閑

碧澗驛曉思

香燈伴殘夢楚國在天涯月落子規歇滿庭山杏花

敷水小桃

敷水小橋東娟娟照露叢所嗟非勝地堪恨是春風

哭李羣玉

段成式 一首

曾話黃陵事今爲白日催老無兒女累誰哭到泉臺

金陵懷古

司空文明 一首

輦路江楓暗宮潮野草春傷心庾開府老作北朝臣

吳聲子夜歌

薛竒童 一首

淨掃黃金階飛霜皎如雪下簾彈箜篌不忍見秋月

萬首唐人絕句卷第十六

萬首唐人絕句卷第十七

五言一百首

築城詞二首

陸龜蒙 六十五首

城上一培土手中千萬杵築城畏不堅堅城在何處
莫歎將軍逼將軍要卻敵城高功亦高爾命何勞惜

春曉

春庭曉景列清露花暹迤黃蜂一過慵夜夜棲香藥

雜興

桃李傍簷楹無人賞春華時情重不見却憶菖蒲花

鴈

南北路何長中間萬弋張不知煙霧裏幾隻到衡陽
寄遠

鬢亂羞雲卷眉空羨月生中原猶將將何日重卿卿
庭前

合歡能解恚萱草信忘憂盡向庭前種萋萋特地愁
洞房怨

玉插朝扶鬢金梯晚下臺春衫將別淚一夜兩難裁
江行

酒旗菰葉外樓影浪花中醉帆張數幅唯待鯉魚風
巫峽

巫峽七百里巫山十二重年年自雲雨環珮竟誰逢
歸路

漸入新豐路衰紅映小橋渾如七年病初得一丸銷
南塘曲

妾住東湖下郎居南浦邊閑臨煙水望認得采菱船
黃金二首

自古黃金貴猶沽駿與才近來簪珥重無可上高臺
平分從滿篋醉擲任成堆恰莫持千萬明明買禍胎

夕陽

渡口和帆落城邊帶角收如何茂陵客江上倚危樓

殘雪

桂冷微停素峯乾不徧嵐何谿背林處猶覆定僧庵

疊韻山中吟

瓊英輕明生石脉滴瀝碧玄鈿仙偏憐白幘客亦惜

雙聲溪上思

溪空唯容雲木密不墮雨迎漁隱映間安問謳鴉榜

古態

古態日漸薄新糝心更勞城中皆一尺非妾髻鬢高

大堤

大堤春日暮驄馬解鏤衢請君留上客容妾薦彫胡

金陵道

北鴈行行直東流澹澹春當時六朝客還道帝鄉人

離騷

天問復招蒐無因徹帝閤豈知千麗句不敵一讒言

寄南岳客乞靈蕪香

聞說融峯下靈香似反蒐春來正堪采試爲斲雲根

山陽燕中郊樂錄

淮上能無雨回頭揔是情蒲帆渾未織爭得一歡成

對酒

後代稱歡伯前賢號聖人且須謀日富不要道家貧

偶作

雙眉初出鬢兩鬢正藏鴉自有王昌在何勞近宋家

有示

相對莫辭貧蓬蒿任塞門無情是金玉不報主人恩

秋思三首

桐露珪初落蘭風珮欲衰不知能賦客何似狂刀兒

誰在嫖姚幕能教礮歷車至今思秃尾無以代寒蕤

未得同薤杵何時減藥囊莫言天帝醉秦暴不靈長

早春

雨冷淮添暑煙初不著春數枝花類小愁殺鬪芳人

懷仙三首

聞道陽都女連娟耳細長自非黃犢客不得到雲房

但服鑲剛子兼吟曲素詞須知臣漢客還見布龍兒

神燭光華麗靈祛羽翼生已傳食玉粒猶自買雲英

芙蓉

閑吟鮑昭賦更起屈平愁莫引西風動紅衣不耐秋

春思

怨鶯新語澁雙蝶鬪飛高作箇名春恨浮生百倍勞

子夜四時歌

春

山連翠羽屏草接煙華席望盡南飛燕佳人斷消息

夏

蘭眼擡路斜鶯唇映花老金龍傾漏盡玉井敲冰早

秋

涼漢清沉寥衰林怨風雨愁聽絡緯唱似與羈魂語

冬

南雲走冷圭北籟號空木年年任霜霰不減簷管綠

風人詩四首

十萬全師出遙知正憶君一心如瑞麥長作兩岐分

破七禾供朝饗須憐是苦辛曉天窺落宿誰識獨醒人

旦日思雙履明時願早諧丹青傳四瀆難寫是秋懷
聞道更新幟多應廢舊旗征衣無伴擣獨處自然悲

回文

靜煙臨碧樹殘雪背晴樓冷天侵極戍寒月對行舟

樂府雜詠六首

雙吹管

長短裁浮筠參差作飛鳳高樓微月夜吹出江南弄

東飛鳧

裁得尺錦書欲寄東飛鳧脰短翅亦短雌雄戀菰蒲

花成子

唐詩卷二十一

春風等君意亦解欺桃李寫得去時真歸來不相似

月成弦

孤光照還沒轉益傷離別妾若是常娥長圓不教缺

孤燭怨

前回邊使至聞道交河戰坐想鼓鞞聲寸心攢百箭

金吾子

嫁得金吾子常聞輕薄名君心如不重妾腰徒自輕

人日代客子是日立春

人日兼春日長懷復短懷遙知雙綵勝併在一金釵

追和幽獨君詩

靈氣獨不死尚能成綺文如何孤窆裏猶自讀三墳

大子夜歌二首

歌謠數百種子夜最可憐慷慨吐清音明轉出天然

絲竹發歌響假器揚清音不知歌謠妙聲勢出口心

子夜警歌二首

鏤枕傳綠酒雕鑪薰紫煙誰知苦寒調共作白雪絃

恃愛如欲進含羞出不前朱口發豔歌玉指弄嬌絃

子夜變歌三首

人傳歡負情我自未嘗見三更開門去始知子夜變

歲月如流邁春盡秋已至熒熒條上花零落何乃駛

歲月如流邁行已及素秋蟋蟀吟堂前惆悵使儂愁

江南曲五首

魚戲蓮葉間參差隱葉扇鷓鴣鷓鴣窺湫澗無因見
魚戲蓮葉東初霞射紅尾傍臨謝山側恰值清風起
魚戲蓮葉西盤盤舞波急潛依曲岸涼正對斜光入
魚戲蓮葉南欹危午煙疊光搖越鳥巢影亂吳娃檝
魚戲蓮葉北澄陽動微漣回看帝子渚稍背鄂君船

閑夜酒醒

皮日休 十三首

醒來山月高孤枕 祥書裏酒渴漫思茶山童呼不起

和陸魯 玉風人詩三首

刻石書離恨因成別後悲莫言春蠶薄猶有萬重思
鏤出容刀飾親逢巧笑難日中騷客珮爭柰即闌干
江上秋聲起從來浪得名逆風猶挂席苦不會凡情

和幽獨君

念爾風雅魄幽咽猶能文空令傷菟鳥啼破山邊墳
雙聲溪上思

疎杉低通灘冷鷺立亂浪草彩欲夷猶雲容空淡蕩

古函關

破落古關城猶能扼帝京今朝行客過不待曉鷄鳴

聰明泉

一勺如瓊液將愚擬望賢欲知心不變還似飲貪泉
史處士

山期須早赴世累莫遲留忽遇狂風起閑心不自由
芳草渡

溪南越鄉首古柳渡江深日晚無來客閑船繫綠陰
古宮詞三首

樓殿倚明月參差如亂峯官花半夜發不待景陽鍾
閑騎小步馬獨遊萬年枝盡日看花足君王自不知
玉枕寐不足官化空獨簷梁間燕不睡應怪夜明簾

惜花

任蕃一首

無語與花別細看枝上紅明年又相見還恐是愁

自君之出矣

李康代一首

自君之出矣梁塵靜不飛思君如滿月夜夜減容暉

銅雀妓

朱光弼一首

魏王銅雀妓日暮管絃清一見西陵樹悲心舞不成

採蓮

劉方平四首

落日晴江裏荆歌艷楚腰採蓮從小慣十五即乘潮

京兆眉

新作蛾眉樣誰將月裏同有來凡幾日相效滿城中

春雪

飛雪帶春風徘徊亂繞空君看似花處偏在洛陽東

望夫石

佳人成古石蘚駁覆花黃猶有春山杏枝枝似薄妝

觀妓

李何一首

向晚小乘遊朝來新上頭從來許長袖未有客難留

送客往睦州

楊凌六首

水闊尺南天孤舟去眇然驚秋路傍客日暮數聲蟬

送客之蜀

西蜀三千里巴南水一方曉猿天際斷夜月峽中長

剡溪看花

花落千回舞鶯聲百轉歌還同異方樂不奈客愁多

江中風

白浪暗江中南溇路不通高檣帆自滿出浦莫呼風

破扇

粉落空牀棄塵生故篋留先來無一半情斷不勝愁

賈客怨

山水路悠悠逢灘即滯留西江風未便何日到荊州

留別

楊凝六首

玉節隨東閣金閨別舊僚若為花滿寺躍馬上河橋

送客往洞庭

九江歸路遠萬里客船還若過巴江水湘東滿碧煙
別友人

倦客驚危恐傷禽遶樹枝非逢暴公子不敢涕流離
初渡淮北岸

別夢雖難覺悲魂最易銷殷勤淮北岸鄉近去家遙
詠雨

塵寰多人路泥歸足燕家可憐撩亂點濕盡滿宮花
柳絮

河畔多楊柳追遊盡狹斜春風一回送亂入莫愁家
花枕

席上枕香枕樓中蕩子妻那堪一夜裏長濕兩行啼
思婦
李愿一首

良人久不至唯恨錦屏孤顛顛衣寬日空房問女巫

萬首唐人絕句卷第十七

萬首唐人絕句卷第十八

五言一百首

中秋

司空圖 七十五首

閑吟秋景外萬事覺悠悠此夜若無月一年虛過秋

偶題

水榭花繁處春晴日午前鳥窺臨檻鏡馬過隔墻鞭

閑步

幾處白煙斷一川紅樹時壞橋侵轍水殘照背村碑

春中

伏溜侵堦潤繁花隔竹香嬌鶯方曉聽無事過南塘

